

Сургъулин шин джилд белдлгънд онц оньган өгхмн



Таньгъчин Советин шишлнь комиссд

Таньгъчин Советин шишлнь комисс шидрә хург кев. Эн хург деер таньгъчин эрдм-сур-гъулин отделин заведующин дарук А. И. Седунова „Сургъулин шин джилд школмуд белдлгън ямр йовхин туск“ доклад кев. Таньгъчин школмудар сургъулин шин джилд белдджәхин тускар тодрха кевәр цәәлгъдж келв.

—Урдк джилмүдәс ончта болджахнь, таньгъчар эн джилд хальмг классмуд гархмн, — гидж үр Седунова докладтан темдгддж келв. — Хальмг сургъульчнр дасх эврә келәр бичсн учебникүд белдгддж бәәнә. Хальмг багшир бас белдгддж бәәнә. Сургъулин шин

джилд хальмгар 40 класс гархмн.

Хург деер бослж үг келцхәсн комиссин члед сургъулин шин джилд белдлгънә кәдлмш дегәд хашнъгар кегддж бәәхиг, тер йовдлд оли кәр седклән өгчәхиг, шамдад күцәлгъ некджәхиг цугъар темдгддж келцхәв.

Ода күртл зәрм школмуд яслгън болн шин школмуд тосхлгън дуусгдад уга, школин дотр зер-зевнь, учебникүднъ зөбгддж авгдад уга. Школмудиг учебникүдәр тетгх зөвтә таньгъчин потребсоюзин кәдлмшт эс орлцдг, тәрәс кәндә бәәдг үүлдвр таньгъчин эрдм-сургъулин отдел кедгиг шалгъдж келцхәв.

Хальмг келәр гарх учебникүд бас белн болад уга. Тер учебникүд эрк биш цаглагъан, сургъуль экллгънлә хамдан белн кегдх зөвтә.

Школмудиг буфет, халун хот, бичх цаасн, тетрадь, карандаш, умсх хувцар тетгх тәрт таньгъчин эрдм-сургъулин отдел оньган өгхмн. Интернат бүрдәх тәрт йоста оньган тәвхмн, тер хамгин эваргъиг эртәснъ хәәх кергтә.

Школмуд сургъулин шин джилд белдлгън муугъар кегдджәхиг, тер тәриг КПСС-н таньгъчин комитетд болн таньгъчин күцәгч комитетд тәвхмн гидж шишлнь комисс шиидв.

Н. ЧОНОВА.